

आकाशवाणी जयपुर-अजमेर
प्रादेशिक समाचार

दिनांक 26.10.2024

समय: 18.45 बजे

- उपराष्ट्रपति जगदीप धनखड़ भणार्ई-लिखाई ने समाज मांय बदलाव अर विकास री बुनियाद बतायो-आई.आई.टी. जोधपुर रा दीक्षांत समारोह मांय सिरकत कीनी।
- प्रधानमंत्री नरेन्द्र मोदी काल संवारे 11 बज्यां आकाशवाणी ऊं प्रसारित कर्या जावण वाळा खास कार्यक्रम 'मन की बात' मांय विचार बतावेला।
- मुख्यमंत्री भजन लाल शर्मा जयपुर अन्तर्राष्ट्रीय हवाई अड्डा रा टर्मिनल-वन रो उद्घाटन कीनो।
- प्रदेश मांय दीवाळी रा त्यौहार री तैयारियां ज़ोर पकड़्यो।

000

उपराष्ट्रपति जगदीप धनखड़ कह्यो है के भणार्ई-लिखाई बदलाव अर विकास रो बुनियादी आधार है। वे आज आईआईटी जोधपुर रा 10वां दीक्षान्त समारोह मांय बोल रह्या हा। धनखड़ कह्यो के भारत सकारात्मक बदलाव रा दौर ऊं गुजर रह्यो है अर अणगिणत मौकां अर उम्मीद री धरती है। यूपीआई रो जिकर करता थकां उपराष्ट्रपति कह्यो के भारत मांय रोजीना औसतन 466 मिलियन डिजिटल लेनदेन व्हे रह्या है जो नुवी संचार क्रांति रो नतीजो है। वे कह्यो के भारत मांय दुनिया रो तीजो मोटो स्टार्टअप इकोसिस्टम है। वे एक पेड़ मां के नाम अभियान रा तहत पौधा ई रोप्या। कार्यक्रम मांय केंद्रीय मंत्री गजेंद्र सिंह शेखावत कह्यो के दुनिया मांय भारत री नुवी ओळखाण बण रही है। दीक्षान्त समारोह मांय उपराष्ट्रपति 1084 विद्यार्थियां ने डिग्रियां दीनी अर होशियार विद्यार्थियां ने सोना रा तमगा दे र नवाज़ा। ई मौके आईआईटी जोधपुर मांय एआईओटी लैब अर इलेक्ट्रॉनिक निर्माण इकाई रो ऑनलाइन उद्घाटन ई करी ज्यो।

000

प्रधानमंत्री नरेन्द्र मोदी आकाशवाणी ऊं ई दीतवार 27 अक्टूबर ने प्रसारित कर्या जावण वाळा खास कार्यक्रम 'मन की बात' मांय विचार बतावेला। आ हर महीना प्रसारित कर्या जावण वाळा ई रेडियो कार्यक्रम री 115 वीं कड़ी व्हेला। ओ कार्यक्रम आकाशवाणी अर दूरदर्शन रा पूरा नेटवर्क माथे संवारे 11 बज्या प्रसारित कर्यो जावेला। ई सागे ई आकाशवाणी अर दूरदर्शन समाचार, प्रधानमंत्री कार्यालय अर सूचना अर प्रसारण मंत्रालय रा यू-ट्यूब चैनलां माथे अर न्यूज ऑन एआईआर एप माथे ई मन की बात कार्यक्रम प्रसारित कर्यो जावेला।

0000

भारतीय अंतरिक्ष अनुसंधान संगठन - इसरो रा अध्यक्ष डॉ. एस सोमनाथ कह्यो है के अंतरिक्ष प्रौद्योगिकी समय सागे और आसान बण रही है अर इण ने काम लेवण लगातार बध रह्यो है। वे आज आईआईटी दिल्ली रा एक कार्यक्रम मांय बोल रह्या हा।

डॉ. सोमनाथ कह्यो के अंतरिक्ष प्रौद्योगिकी रो सकारात्मक असर सीधा तौर ऊं माली व्यवस्था, नौकरी-धंधा रा बूता अर नौकरी-धंधा रा मौका पैदा करण माथे पड़ रह्यो है।

000

केंद्रीय प्रत्यक्ष कर बोर्ड—सीबीडीटी कंपनियां सारू आकलन साल 2024—25 री इन्कम टैक्स रिटर्न दाखिल करण री मियाद बधा दीनी है। कॉरपोरेट करदाता अब 15 नवंबर ताई आयकर रिटर्न दाखिल कर सकेला। पैली रिटर्न दाखिल करण री आखिरी तारीख 31 अक्टूबर ही।

000

कर्मचारी राज्य बीमा—ईएसआई योजना रा तैत ई साल अगस्त महीना मांय 20 लाख 74 हजार नुवा कर्मचारी नाम मण्डाया। श्रम अर रोजगार मंत्रालय रे मुजब अगस्त महीना मांय 28 हजार 9 सौ 17 नुवा प्रतिष्ठान ईएसआई योजना रा दायरा मांय लायी ज्या। लारला साल अगस्त महीना री तुलना मांय ई साल ईएसआई योजना मांय नाम मण्डावण री रेट मांय 6 दशमलव आठ फीसदी री बधोतरी व्ही।

000

मुख्यमंत्री भजन लाल शर्मा आज जयपुर अंतर्राष्ट्रीय हवाई अड्डा रा टर्मिनल नम्बर एक रो उद्घाटन कीनो। ई मौके वे कह्यो के प्रदेश मांय हर हलका सारू संभावनावां है। मुख्यमंत्री कह्यो के सरकार री लारला दस साल मांय करी ज्यी कोशिशं ऊं अब आम आदमी सारू ई हवाई सफर आसान व्हे ग्यो। वे कह्यो के टर्मिनल एक ऊं दिसावर सारू उड़ानां सरू व्हेवण ऊं प्रदेश ने घणो फायदो मिलेला। मुख्यमंत्री कह्यो के ओ टर्मिनल प्रदेश मांय दिसावर ऊं निवेश ने बधावो मिलेला। वे कह्यो के प्रदेश रा हर ज़िला मांय हैलीकॉप्टर सारू हैलीपेड बणाया जावेला।

ओ टर्मिनल लारला 11 साल ऊं बंद हो अर अब इण ने नुवो करी ज्यो है। अब ई टर्मिनल ऊं दूजा देशां सारू हवाई जहाज़ उड़ान भरेला।

000

राष्ट्रपति द्रौपदी मुर्मू कह्यो है के जनजातीय लोगों रा जीवण रा तरीका ऊं सीख ले र देश रा लगातार विकास मांय खास योगदान कर्यो जा सके है। वे आज भारतीय प्रौद्योगिकी संस्थान—आईआईटी भिलाई रा दीक्षांत समारोह मांय बोल रही ही।

राष्ट्रपति कह्यो के विकास री प्रक्रिया मांय जनजातीय लोगों री सक्रिय भागीदारी ऊं ई देश रो पूरो विकास संभव है।

राष्ट्रपति कह्यो के आदिवासी समाज रा लोग कुदरत ने करीब ऊं समझे है अर सदियां ऊं पर्यावरण सागे तालमेल बैठा र रहता आया है। जळसा मांय राष्ट्रपति 7 विद्यार्थियां ने सोना रा तमगा दे नवाजा।

000

चूरू मांय पैली वाळा विधायक अर किसान नेता कुम्भा राम आर्य री मूरत रो आज अनावरण करी ज्यो। ई मौके कांग्रेस रा प्रदेश अध्यक्ष गोविंद सिंह डोटासरा मूरत ने माळा पहरा र नमन कीनो। वे कह्यो के कुम्भा राम आर्य किसानां रा मसीहा हा अर वे सगळां ने सागे ले र किसानां रा भला सारू काम कीनो।

000

प्रदेश मांय दीवाळी रा त्यौहार री तैयारियां जोर—शोर ऊं चाल रही है। जिला प्रशासन, कारोबारी अर जनता री ओर ऊं त्यौहार री तैयारियां करी जा रही है। शहरां मांय खास ठौड़ा, चौराहां अर इमारतां ने रंग—बिरंगी रोशनी ऊं सजायी जा रही है। जयपुर रा बाजारां मांय सोहवणी सजावट करी ज्यी है अर न्यारी—न्यारी ठौड़ा स्वागत द्वार बणायी ज्या है। भीलवाड़ा मांय घरां अर कारोबारी प्रतिष्ठानां माथे सजावट करी जा रही है। अजमेर मांय श्रीनगर रोड ने पहली दफा डोढ़ किलोमीटर ताई खास रोशनी ऊं सजायी ज्यो है। वठे नगर निगम री ओर ऊं आनासागर चौपाटी माथे सोहवणी रोशनी करी ज्यी है। अजमेर मांय दीवाळी रे मौके ग्रीन पटाखा बेचण सारू अढाई सौ लोगों ने जिला प्रशासन अस्थाई लाइसेंस जारी कीना है।

000

दीवाळी रे मौके मिलावटी सामान अर खराब मिठाइयां री बिक्री माथे रोक लगावण सारू प्रदेश मांय शुद्ध आहार—मिलावट पर वार अभियान चलायो जा रह्यो है। कोटपूतली—बहरोड़ ज़िला रा बानसूर अर बहरोड़ मांय खाद्य सुरक्षा अहलकार कार्रवाई कीनी। बहरोड़ मांय 200 किलोग्राम खराब पनीर नष्ट करायी ज्यो। प्रदेश रा न्यारा—न्यारा ज़िलां मांय ई स्वास्थ्य विभाग री टीमां न्यारी—न्यारी दुकानां ऊं नमूना ले र जांच सारू भिजवाया है। ब्यावर जिला रा बांदनवाड़ा अर बिजयनगर मांय ई कार्रवाई करी ज्यी अर मावा, मिठाई, घी अर दूध रा नमूना लिया ज्या।

000

पाली मांय धन्वंतरि जयंती रा सिलसिला मांय आयुर्वेद विभाग री ओर ऊं आरोग्य सप्ताह मनायो जा रह्यो है। ई रा तैत अस्पतालां अर गांवां मांय महिलावां ने आयुर्वेद रे जरिये हार्मोन संतुलन, मासिक धर्म रा दिनां मांय स्वास्थ्य देखभाल अर स्वास्थ्य ठीक राखण रा बारा मांय जाणकारी दीरीजी। विभाग रा उपनिदेशक बजरंगलाल शर्मा बतायो के सप्ताह रा तहत आयुर्वेद रे जरिये कुदरत रा परीक्षण अर व्यक्तिगत स्वास्थ्य समाधान रा बारा मांय जाणकारी दी जावेला। इण ई सिलसिला मांय दौड़ ई राखी जावेला।

000

पाली ज़िला रा तखतगढ़ मांय कैबिनेट मंत्री जोराराम कुमावत आज एईएन दफ्तर रो उदघाटन कीनो। ई मौके प्रधानमंत्री सूर्य घर मुफ्त बिजली योजना री विगतवार जाणकारी दीरीजी अर जनता ऊं घरां री छतां माथे सूरज री रोशनी ऊं बिजली बणावण री मशीनां लगावण री अपील करी ज्यी।

000

श्रीगंगानगर रो स्थापना दिवस आज हरख—उमाव सागे मणायी ज्यो। ई मौके गंगासिंह चौक माथे राखी ज्या कार्यक्रम मांय महाराजा गंगासिंह ने सिरधाभाव सागे याद करी ज्या। ई पाछे शिवपुर हैड माथे हवन कर र पूजा—अर्चना करी ज्यी। ई मौके राखी ज्यी सगळा धर्मा री प्रार्थना सभा मांय न्यारा—न्यारा धर्म गुरु जिला री खुशहाली री कामना कीनी। ई मौके लोक कलाकार पर्यटन विभाग री ओर ऊं सांस्कृतिक कार्यक्रम पेश कीनो अर मौजूद लोगां ने नशामुक्ति री सौगंध दिरायी ज्यी।

000

राजस्थान प्राथमिक अर माध्यमिक शिक्षक संघ रो शैक्षिक सम्मेलन आज जयपुर मांय पूरो व्ह्यो। दो दिन रा ई सम्मेलन मांय अध्यापकां री न्यारी—न्यारी समस्यावां माथे विचार करी ज्यो। ई मौके विधायक कैलाश वर्मा शिक्षकां री परेशानियां बेगी ई दूर करण रो भरोसो दिरायो।

000

राज्य रा 7 विधानसभा हलकां मांय उप—चुनाव सारू 13 नवम्बर ने वोट पड़ेला। उप—चुनाव मांय जनता री बत्ती ऊं बत्ती भागीदारी तैस करण सारू मतदाता जागरूकता अभियान चलायो जा रह्यो है। दौसा मांय आज जिला स्वीप टीम एक ब्याह मांय पूग र बींद—बींदणी, बारातियां अर वां रा पिरवार वाळां ने वोट जरूर देवण री सौगंध दिरायी ज्यी। स्वीप टीम राजस्थान शारीरिक शिक्षा शिक्षक संघ रा जिला अधिवेशन मांय सगळा शारीरिक शिक्षकां ने वोट जरूर देवण री सौगंध दिरायी। स्वीप रा जिला समन्वयक रामवीर चौधरी बतायो के नुक्कड़ नाटक री मार्फत चुनाव ऊं जुड़्या पांच एप रा बारा मांय जाणकारी दी जा रही है।

000